

INUIT ATAQATIGIIT

INATSISARTUNI



7. oktober 2009

Inatsisartut suleriaasianni § 36 imm. 1 innersuussutigalugu naalakkersuisunut apeqquteqaat.

Ukiuni aggersuni sanaartornikkut pilersaarutit eqqarsaatigalugit taakkunanilu mingutsitsinerup annikillisarnissaa siunertaralugu Naalakkersuisut qanoq pilersaaruteqarpat, tassani assersuutigalugu annikitsumik ikummatissatigut atuisunik Co2-millu aniatitsinngitsunik sanaartornerit aamma nammineq ikummatissatigut pilersortunik sanaartornerit eqqarsaatigalugit?

(Inatsisartunut ilaasortaq Naaja Nathanielsen, Inuit Ataqatigiit)

Tungavilersuutit:

Ukiuni atukkatsinni anguniakkani unamminarnerpaat ilaat tassaavoq inuit pilersitaannik silap allanngoriartornerata akiorniarnissaa. Tamanna pissuserisatsinnik allannguinnissamik nutaamillu eqqarsartariaaseqalernissamik piumasaqarfiuvoq. Aamma taamaappoq siunissami sanaarnikkut pilersaarusiornermi, taakkumi siunissami ukiorpassuarni silamik sunniisinnaammata. Taamaattumik pissusissamisoorpoq nutaanik sanaartornermi silap pissusianut tunngatillugu apeqqutit eqqumaffiginissaat iliuuseqarfiginissaallu.